



EDITORIAL

Itag-ay ti nalabbaga a bandera iti maika-55 anibersaryo ti Partido!

Iti umay a Disyembre 26, rambakan ti Partido Komunista ng Pilipinas ti maika-55 anibersaryo ti pannaka-itakder na. Maysa iti kangatuan a rebengen ti Partido itatta ket ti panagpatibker iti bukod iti ideolohiya, pulitika ken organisasyon tapno naan-anay a paayen ti kampanya ti pananglapped ti kabusor, idauluan ti masa iti panaglaban iti papet, parigat ken pasista a rehimeng US-Marcos ken iyabante ti demokratiko a rebolusyon ti umili.

Usaren tayo nga okasyon ti anibersaryo tapno pasingkedan manen ti panggeddeng ti tunggal kadre ken kameng, kabarbaro man wenco nabayagen, nga itantudo ti Marxism-Leninismo-Maoismo ken dagiti basaran a prinsipyo ti Partido a nakanad iti konstitusyon ken programa na. Ingato tayo manen dagiti gemgem ken baliksen ti sapata nga aramiden ti amin a kaelan tapno ingato ti proletaryo a rebolusyonaryo a kaammuan, ken pagserbian ken ilaban ti interes ti umili iti amin a panawen, kas ti insapata ti tunggal

maysa iti panagkameng iti Partido.

Intay met rambakan iti Disyembre 16, ti rebolusyonaryo a biag ni Kadua Jose Maria Sison, daulo a nagitakder ti Partido, iti okasyon ti umuna nga anibersaryo iti ipupusay na. Nairut tayo a petpetan dagiti patawid na a sursuro iti panangiyabante ti rebolusyonaryo a pannakidangadang ti umili a Pilipino.

Intay lagipen amin dagiti martir ken bannuar ti rebolusyon a Pilipino. Kangatuan a pammadaway kada-kuada iti agtultuloy nga panagram-

paya ken panagregta ti armado a pannakidangadang ken dagiti pannakidangadang a masa. Naan-anay na nga inawan kinapudno ti ibagbag a ti kabusor a marebbek ken gibusan na ti Partido, ti hukbo ken nagkaykaya a prente.

Agraraira ti kasasaad a pabor tapno lalo a riingen, organisaen ken patignayen ti nalawa nga umili a Pilipino. Napartak a malunglungot ti agari-ari a sistema a malakolonyal ken malapyudal iti Pilipinas. Awananawa daytoy a gunggunggonen ti aggidgiddan a krisis iti ekonomya ken pulitika gapu iti nalungsot, parigat, papet ken pasista a panagturray ti rehimeng Marcos.

Mangidandanon daytoy ti nakkarkaro a panagsagaba iti umili a Pilipino. Kangrunaan a rebbengen ti Partido nga idauluan ti nalawa a

masa iti pagilian a naregget nga agkalkalikagom a makidangadang tapno ilaban dagiti pangkabiagan ken pagimbagan da, ken salakniban dagiti demokratiko a kurbengen da.

Iti tengnga ti pangkagimongan a riribuk, adda iti posisyon ti Partido nga idauluan ti panagregta dagiti pannakidangadang masa, ken palawaen ken papigsaen ti rebolusyonaryo a tignayan a masa agpada iti syudad ken kaaw-awayan, kagiddan ti sibubukel a panagpabwelo iti demokratiko a rebolusyon ti umili.

Sipipinget tayo a palawaen ken papigsaen ti Partido ken ti organisa-do nga intar ti masa. Ilinteg dagiti panagsiasi ken rimbawan amin dagiti kakapuyan ken panagdua-dua. Uyusen ken pagmaymaysaen ti pungtod iti barukong ti masa, ken idauluan dagiti panaglaban da aglalo iti sango ti nakaro a panangidadanes ken pananggundaway. Para kadagiti baro a rebbengen, kasapulan tayo dagiti baro a pwersa a napnuan gagar, regta ken militansa. Sukatan tayo dagiti napukaw ken timmamnay.

Naragsakan ti Partido iti sangsangkamaya a pablaak idi Nobyembre 23 ti National Democratic Front of the Philippines (NDFP) ken ti Gobyerno ti Republika ti Pilipinas (GRP) tapno lukutan manen ti tungtungan a kappia.

ANG Bayan

Tawen LIV No. 23 | Disyembre 7, 2023

Ti Ang Bayan ket maipabpablaak iti lengwahe a Pilipino, Bisaya, Iloko, Hiligaynon, Waray ken Ingles. Agawawat ti Ang Bayan kadagit kontribusyon nga artikulo ken damdamag. Maallukoy met dagiti agbasbasa nga agidanun kadagit dillaw ken rekomendasyon para iti panagdur-as ti pagiwarnak tayo.

Daldaliasaten tayo ti laban iti negosasyon kagiddan ti panagisayangkat iti armado a pannakidangadang tapno gun-oden ti nainkalintegan ken pangmabayagan a kappia. Kabatog daytoy ti panagitandudo ti pudno a reforma iti daga, nailian nga industriyalisasyon, nailian a wayawaya ken pudno a demokrasya.

Supiaten ti panagusar ditoy ti reaksyonaryo nga estado kas instrumento iti panangallilaw tapno iduron ti NPA nga ibbatan dagiti armas, ken ikkatan ti pigsa ti rebolusyonaryo a tignayan. Naan-anay nga ilak-sid ti ubbaw a proklamasyon nga "amnestiya" ti rehim Marcos nga inruar para iti manangallilaw a panggep a panagpasuko. Agserserbi laeng daytoy iti pangbukod nga interes dagiti sumagmamano a timalikud ken nagtraydor iti interes ti umili. Nasken nga ilaksid, tubngaren ken ibelleng ida iti basuraan ti paka-saritaan.

Iti intero a lubong, limmatak ti kinaannatop nga agbaringkuas laban iti ganggannaet a panagsakop ken pasismo iti nakired nga armado a pannakilaban ti umili a Palestino, kasta met dagiti umili iti Myanmar ken dadduma pay a pagilian. Naimpanawenan ti inrusuat ti NDFP nga internasyunal a teoretikal a kumperrensya maipanggep iti impperialista

a gubat a nagserbi nga okasyon tapno papigsaen ti panagtittinulong ti naduma-duma a proletaryo, anti-imperialista ken manangwayawaya a tignayan iti intero a lubong, ken papigsaen ti panangwaragawag a mangiyabante ti nainkalintegan a gubat ken armado a pannakidangadang laban iti impperialista a gerra.

Dagiti komunista a Pilipino ket paset ti sangalubongan a proletaryo a rebolusyon laban iti impperialismo, ti maudi a tukad ti agang-angsab a kapitalismo. Ibagbagi na ti rebolusyonaryo a manangwayawaya a tignayan ti umili a Pilipino. Daton na iti sangalubongan a tignayan nga anti-imperialista ti panaglaban iti umirirteng a hegemonismo ti US iti paglian iti langa ti umad-adu a base militar ken masansan ken dadakkel a war games iti kadagaan ken baybay iti Pilipinas. Nasken a todo a labanan ti sibubukel nga umili ti panangusar ti US iti pagilian kadagiti geopolitikal a panggep na iti Asia-Pacific, ken isilpo daytoy iti sangalubongan a pannakidangadang tapno lappedan ti panaggil-ayab ti inter-imperialista a gerra.

Iti syudad ken kaaw-awayan, agtultuloy nga agpappapigsa ti Partido ken dagiti rebolusyonaryo a pwersa. Sipipinget nga iyab-abante ti rebolusyonaryo a tignayan a masa dagiti amin a demokratiko a dasig ken sektor tapno ilaban dagiti interes da. Agtultuloy a pappapigsaen ken palpalawaen ti nagkaykaya a prente nga antipasista, anti-imperialista ken antipyudal tapno buklen ti kalalawaan a panagkaykaya ti umili ken isina ti agturturay a rehim Marcos. Pinaka-importante, agtultuloy nga agpappapigsa ti NPA iti dalan ti armado a pannakidangadang kas kangrunaan nga igam ti panaglaban.

Sitatalek ti Partido nga iti napi-ngeit a panagregget ti amin a kadre ken kameng, maiduulan na ti agtultuloy a panagpapigsa ti rebolusyonaryo a pannakidangadang iti amin a tay-ak, ken agballigi ti nailinan-demokratiko a rebolusyon iti Pilipinas agturon iti sosyalista a masanguanan.

AB

Linaon

Editoryal: Itag-ay ti nalabbaga a bandera iti maika-55 aniversario ti Partido!	1
Panaglukat manen ti NDF-GRP peace talks	3
82nd IB, dua daras a pinaputukan ti NPA-Iloilo	4
Agtutubo iti milisyang bayan	4
2 panagsanay militar, inrusuat ti NPA-ST	4
Dagiti protesta	4
Panagpapigsa ti KM kadagit kolehiyo	5
Iti ababa a sarita	6
Masaker iti Sityo Canada	7
3 Lumad, pinatuduan ti bala ti 88th IB	7
7 aktibista sadiay Cebu, tiniliw	8
Korapsyon ti militar ken NTF-Elcac	8
21-gun salute para kadagit martir, inrusuat	8
Operasyon a dredging sadiay MisOr	9
Henosidyo a marka-Amerika	10

Ti Ang Bayan ket ipabpablaak ti Komite Sentral
ti Partido Komunista ng Pilipinas dua a daras iti tungal bulan



ang.bayan@cpp.ph

NDFP ken GRP, nagtulag a lukatan manen ti tungtungan a kappia

Nagsina nga inwaragawag idi Nobyembre 28 ti Negotiating Panel ti National Democratic Front of the Philippines (NDFP) ken nangangato nga opisyal iti gabinete ken militar ti Gobyerno ti Republika ti Pilipinas (GRP) ti panggep ti dua a benneg a lukatan manen ti tungtungan a kappia. Impakaammo da iti publiko ti nagsilpo a pablaak a pinirmaan ti NDFP Negotiating Panel ken ti GRP idi Nobyembre 23 sadiay Oslo, Norway.

Simmango iti publiko ken nagbas a kadagiti pablaak da Kadua Julie de Lima, ken dagiti miyembro ti NDFP Negotiating Panel a da Kadua Coni Ledesma, ken Nonoy Palima, ken ni Ka Luis Jalandoni kas daulo a parabagbaga.

Ti Oslo Joint Statement ket deklarasyon ti panggep wenco panagtirigagay a luktan manen ti tungtungan ken buklen ti balabala nu kasan no nga isayangkat daytoy. Maysa daytoy a pangkabuklan a deklarasyon nu sadinno a pinagtipon dagiti tarigagay ti agsumbangir a benneg: ti panangrisut iti "nauuneg a nakaramut a sosyo-ekonomiko ken pulitikal a bambanag" ken "panangrisut kadagiti ramut ti armado a risiris," iti benneg ti NDFP; ken iti bangir a benneg, "panaggibus ti armado a pannakidangadang" "ken transpor masyon ti CPP-NPA-NDFP," a pangpanggepen ti GRP.

"Ti Pinagtipon a Pablaak nga agpada a pinirmaan ti NDFP ken GRP ket addaan pateg iti bukod na ken mangluklukat iti ridaw para iti adu a potensyal ken masanguanan iti pa-

nagkalikagum ti maysa a nainkalintegan ken pangmabayagan a kappia iti bukod tayo a pagilian ken para iti pagimbagan ti umili tayo," nakuna ni Ka Luis Jalandoni, kameng ti NDFP National Executive Council ken senior consultant iti tungtungan a kappia, iti aldaw a pinirmaan ti pinagtipon a pablaak. Kunana, nakasagana ti agpada a Partido nga ituloy ti negosasyon kabayatan a "taktakderan dagiti balligi ken makaad-adal manipud kadagiti leksyon iti naglabas."

Ti pinagtipon a pablaak ket imbunga dagiti serye ti impormal a talakayan nga inyaramid sadiay Netherlands ken Norway. Idi pay 2022 a rinugian daytoy iti nagbaeten dagiti emisaryo ti GRP ken ti NDFP iti tulong ti Royal Norwegian Government (RNG). Iti benneg ti GRP, nagpirma ditoy da Special Assistant to the President Antonio Ernesto F. Lagdameo Jr, ti emisaryo a ni Gen. Emmanuel T. Bautista (Ret) ken Presidential Adviser on Peace, Reconciliation and Unity Secretary nga ni Carlito Galvez Jr. Iti benneg ti NDFP, nagpirma da Ka Julie, Ka Luis, Ka Coni,

ken Ka Nonoy. Ti panagpirma ket naimatangan ni RNG Special Envoy Christina Lie Revheim.

Pinagyamanan ti NDFP ti RNG para iti natibker a suporta ken naan-nus a panangikagumaan na tapno pagsaraken ti dua a partido para manen iti panagtungtong. Ti seremonya ti panagpirma iti Oslo ket dinar-ayan ti ministro iti silpo a pangruar ti RNG a ni Espen Barth Eide ken dadduma nga opisyal ti Norway.


Napnuan siit ken tudok

Bayat a naragsakan ti PKP iti panagpirma ti negotiating panel iti pinagtipon a pablaak, binigbig na a napnuan siit ken tudok ti dalan iti panaglukat pay laeng ti tungtungan, ken nakarkaro pay ti dalan agturons iti nainkalintegan ken pangmabayagan a pang-kappia.

Umuna a kagudua nga addang pay laeng daytoy iti panaglukat manen ti negosasyon. Mabalin daytoy a dumanon iti aktwal a panaglukat manen ti tungtungan a kappia, mabalin met a saan.

"Adda ti tungtungan a kappia gapu ta adda ti gerra," panangilaw ni Marco Valbuena, opisyal a daulo iti impormasyon ti PKP. "Ti NDFP ken GRP ket mangibagbagi iti dua a benneg (*co-belligerent*) ti ger-ra sibil iti Pilipinas. Isuda ket agkalaban ken mangibagbagi iti naan-anay nga agsupadi nga interes ken panggep, ngem nagsarak iti negosasyon iti uneg ti deklarado a panggep a panaggun-od ti nainkalintegan ken pangmabayagan a kappia.

Segun met kenni Ka Julie, sangsangoen ti tungtungan ti praktikal a banag kas ti terorista a designasyon ti GRP iti PKP, NPA, NDFP ken pati metten kenni Ka Luis. Kasta met, marigatan ti NDFP iti negosasyon nu agtalinaed a nakabalud dagiti konsultant na nga iligal a tiniliw ken imbalud ti GRP iti uneg ti napalabas nga innem a tawen.



82nd IB, dua dasar a pinaputukan ti NPA-Iloilo

DUA NGA ARMADO nga opensiba ti inrussuat dagiti yunit ti New People's Army (NPA)-Central Panay (Jose Percival Estocada Jr Command) laban iti tropa ti 82nd IB idi Nobyembre 21 ken Nobyembre 12.

Idi Nobyembre 12, rinaut ti NPA-Central Panay ti maysa nga yunit ti 82nd IB iti nagbeddengan ti Barangay Atimonan ken Barasalon sadiay Janiuay. Tinarget met ti NPA ti yunit ti 82nd IB nga agop-operasyon iti Sityo Matagsim, Barangay Aglobong, Janiuay, Iloilo idi Nobyembre 21, alas-2 ti malem.

Dagiti sibilyan ti binales ti 82nd IB idi awan anianaman a pinaltu-paltogan da ti tallo a balay iti lugang idi Nobyembre 21. Maysa a residente ti nasugatan iti makuna a panagpalpaltog.

Agtutubo iti milisyang bayan

ITI MAYSA A bryo iti Southern Tagalog, dakkel ti imbingay ti dua a kameng ti Kabataang Makabayan (KM) nga itatta ket agserserbin kas paset ti milisyang bayan. Kabinnulig ida iti panangisigurado ti seguridad dagiti residente ken iti lokal nga yunit ti New People's Army (NPA) idi nagingde asideg iti komunidad da.

Naregget, mapampususan ken natured da Ka Maki, 23, ken Ka Aja, 21, iti panagakem iti ubra ti milisyang bayan. Dagiti dua ket mangmangged-talon nga inaldaw a sumsumrek kadagiti ka-inyogan ken kataltalanan. Sagpaminsan da met nga agud-udong iti ili tapno agubra iti konstruksyon ken agguardya kadagiti babuyan, manukan, wenco itikan.

Iti maysa a serye ti operasyon dagiti soldado, nagserbi da kas mata ken para-report iti NPA. Regular da nga agrekrekorda kadagiti kabambantayan tapno agkalap ti impormasyon. Isuda met laeng ti agitultulod ti suporta a makan dagiti organisasyon a masa ken sangay ti Partido iti lokalidad para iti NPA.

Iti maysa nga insidente, natured a nagturong ni Ka Maki iti balay ti mammalona nga sigurado na a pagpagnaan dagiti soldado. Pinakalma na ken inammo manipud iti mabutbuteng a mammalona ti detalye dagiti soldado ken nu sadinno ti napanan da. Sigud na nga in-report daytoy iti yunit ti NPA.

Regular met nu agrekorida ni Ka Aja. Katinnulong isuna iti panangpunas kadagiti tugot dagiti Nalabbaga a mannakigubat a dumaldalan wenco agkamkampo iti erya da. Pana-panawen met isuna a pumapa-uneg iti yunit para kadagiti treyning ken panagadal, ken tumultulong iti panagakar-akar dagiti Nalabbaga a mannakigubat. Lalo isuna a nagbalin nga aktibo kalpasan iti naminsan nga inagasan dagiti kakadua.

2 panagsanay militar, inrussuat ti NPA-Southern Tagalog

DUA A YUNIT dagiti Nalabbaga a mannakigubat ti New People's Army (NPA) ti nagturpos iti nagsaruno a panagsanay militar idi Nobyembre kadagiti larangan a gerilya iti Southern Tagalog. Naiyaramid dagiti treyning iti tingga dagiti *focused military operation* ti puersa a militar ken pulis kadagiti larangan iti rehiyon.

Bimmayag ti treyning ti 7-10 aldaw. Limmaok ditoy dagiti kangrunaan ken segundaryo nga opisyal ti NPA, dagiti mannakigubat, uray dagiti puersa ti milisyang bayan.

Segun kenni Ka Guillen, opisyal pampulitika iti maysa kadagiti yunit, "Balligi ti panagsanaytayo iti bangir ti nairteng nga operasyon ti kabusor. Naingato tayo ti kabaelan ken panggeddeng dagiti Nalabbaga a mannakigubat tapno labanan ken parmekan ti nasurdo a kabusor."

Saklaw ti treyning ti panagadal kadagiti basaran a taktika ken teknika iti indibidwal a panaglaban, panagpamilyarisa kadagiti iggem nga armas aginggana aktwal a panagpaputok kadagiti paltog. Nagtreyning dagiti segundaryo ken kangrunaan nga opisyal iti panagkumand.

Iti panangiyuna dagiti opisyal, sinigurado ti organisoado a panagtignay babaen kadagiti maniobra agpada iti opensiba ken depensiba a labanan. Nagun-od met ti panangingato ti tukad ti pigsa ken resistensya ti tunggal maysa a mannakigubat babaen iti inaldaw nga exercise.

Ti panagsanay ket lalo a nagpatibker iti tinnulong ken timpuyog ti tunggal kameng ti yunit iti NPA. Panagleppas ni Ka Guillen, "Masigurado tayo a lallalo a mapatibker ti panagkaykaya tayo bayat a koordinado tayo nga umad-addang paabante iti pannakidangadang tayo."



Maika-160 aldaw ni Bonifacio, linagip. Linagip ti Aldaw ni Bonifacio dagiti nailian-demokratiko a puersa iti Metro Manila, Cebu, Bacolod, Iloilo ken Davao idi Nobyembre 30. Kiddaw da ti nayon-sweldo, trabaho, pampubliko a serbisyo, karbengan ken wayawaya. Kakuyog a nagmartsa dagiti agtutubo a kameng ti Anakbayan, a nagrambak ti maika-25 anibersaryo ti pannaka-itakder da iti agpada nga aldaw.

Martsa para iti Palestine. Nagkukuyog a nagmartsa ti giniasut nga aktibista ken Moro sadiay Manila idi Nobyembre 25 ti malem tapno irupir ti nainkalintegan a kappia iti Palestine ken sigida a panangpasardeng iti kampanya nga henosidyo ken panagbomba ti Zionista nga Israel iti Gaza. Panggep da a dumalan iti embahada ti US ngem sinerraan ida dagiti pulis. Nagmartsa da manipud Luneta agturons Cultural Center of the Philippines iti Roxas Boulevard nu sadinno da nga intuloy ti programa.

Panagpapigsa ti Kabataang Makabayan iti uneg dagiti kolehiyo

Iti nabiit, nagsasaruno nga impablaak ti panagpapigsa ti naduma-duma a tsapter ti Kabataang Makabayan (KM) iti sumaggamano a kangrunaan a pribado ken pampubliko a kolehiyo iti Metro Manila. Idi Nobyembre 30, nagirussuat dagitoy ti naduma-duma nga aktibidad tapno rambakan ti maika-59 nga anibersaryo ti organisasyon da.



KM kadagiti kolehiyo

Idi Nobyembre 20, impablaak ti KM-Armando Mendoza ti panangtakder manen ti tsapter da idi Oktubre 10. Nagsasaritaan da ti oryentasyon ken konstitusyon ti KM, pammadayaw ken panangsaludo kadagiti martir, panagplano kada-giti aktibidad ken panagbotos iti baro a komiteng tagapagpaganap. Pinanaganan ti tsapter kenni Ar-mando Mendoza, estudyante ti University of Santo Tomas idi deka-da 1970.

"Iti panawen nga agdadata ti basol dagiti reaksyunaryo ken napalalo a panangparigat iti umili a Pilipino, agtalatinaed a demokrati-ko a rebolusyon ti umili ti sungbat ti KM," pablaak ti tsapter.

Iti Polytechnic University of the Philippines (PUP) iti Sta. Mesa, Manila, nagisayangkat ti lightning-rally dagiti kameng ti KM-Balangay Kira Mindoro idi Nobyembre 29. Sakbay pay ti *lightning-rally*, nagisayangkat ti OP-OD (plan pintao-plan dikit) ti tsapter iti uneg ti kampus ken impinta dagiti panawa-gan nga "Isulong ang digmang bayan!" "KM@59" ken dadduma pay.

Nagisrussuat met ti OP-OD iti uneg ti kampus dagiti tsapter ti KM sadiy University of the Philippines(UP)-Diliman ken UP-Los Baños. Impaskil met ti KM-Eduardo Aquino iti kampus ti UP Manila ti pablaak na iti panangtakder ti tsapter na idi Nobyembre. Naipadamag met ti

panagpapigsa manen ti KM iti maysa pay a pribado nga unibersidad ken pampubliko a kolehiyo iti Metro Manila iti maudi a gudua ti tawen.

Isyu dagiti agtutubo

Tulbek ti rebbengen ti KM iti uneg dagiti unibersidad ken pagadalan tapno allukoyen dagiti agtutubo a dalliasaten ti dalan ti demokratiko a rebolusyon ti umili ken iyabante dagiti pannakidangadang a masa. Iti interbyu ti Ang Bayan kenni Rose, kameng ti KM iti maysa nga unibersidad iti Cavite, nakuna na nga agtalatinaed dagiti kundi-syon iti uneg ti eskwelaan da a mangparparigat iti agtutubo kas kanyana. Sumaggamano kano daytoy kadagiti isyu a mangiriing iti makabayan a pakinakem ti agtutubo.

"Saan a patas ti it-ited a pondo ti gobyerno para iti basaran a kasa-pulan dagiti estudyante," kuna ni Rose. Reklamo da ti nakaro a kina-kirang dagiti klasrum ken pasilidad a makaap-apektar iti iskedyul ti klase ken kalidad ti panagisuro.

Nakaro a parigat met iti kas kanyana dagiti babayadan iti uni-versidad iti bangir ti libre a matri-kula. Nakurang tapno suportaran ti panagbasa na ken panggastos ti pamilya ti ₱15,000 laeng a sapul da kada bulan. Nayon ni Rose, nakaad-adayo ti kasasaad ti panagbasa iti pagilian iti namnamaen na nga naurnos a serbisyo daytoy.

KM agturong buyot ti umili

Dagitoy a problema ken isyu ti nangallukoy kenni Ka Andrea a pa-nawan ti unibersidad ken tumipon iti New People's Army (NPA).

Istorya na, naimatangan na ti awan panangsungbat kadagiti isyu iti agdama a nalungsot nga sistema ken gubyerno ken dagiti limitasyon ti pannakidangadang iti uneg ti agraraira a sistema. "Aginbibingngeg da (upisyal ti reaksyunaryo nga es-tado) kadagiti lehitimo a kalikagum ti umili." Ammo na a babaen ti ar-mado a panaglaban a magun-od ti maysa a gimong a pudno a mang-sungbat kadagiti kasapulan ti agtu-tubo.

Sakbay a naan-anay a nagiggem ti armas, limmaok ni Ka Andrea iti panag-organisa ti KM iti intar dagiti agtutubo a mammalon. "Uray adda ti pangta dagiti kampo militar ken pa-niktik ti estado iti panag-organisa mi, naballigi mi a naibangon ti tsapter ti KM iti lugar, naannad ken li-med ti panagtignay mi."

Iti uneg ti NPA, nagbalin isuna a nalaing a katinnulong ti yunit iti panagbukel ti tukad-munisipyo a tsapter ti KM iti larangan a pagtig-tignayan. Napadar-ay da iti nakuna a panaggu-ummong ti 50 agtutubo manipud iti 12 barangay. "Napun-punno ti namnama ken regta dagiti agtutubo a dimmar-ay. Umuna a kapadasak daytoy ti panagbukel ti dakkel a tsapter ti KM iti nangat-ngato a tukad," kunana.

Dagiti Panaglabsing iti Karbengan-tao

(Disyembre 1, 2022 – Disyembre 1, 2023)

Bilang ti biktima:

127,386

Bilang dagiti kaso:

957

Pammapatay

79

Panagdukot

87

Panagpilit

898

Napaay a pammapatay

28

Panangaresto ken detensyon

155

Pwersado a panagbakwit ken dislokasyon

4,524

Tortyr

44

Panangpasakit

58

Panangpangta, pananglipit, intimidasyon

103,736


Nangalaan: Espesyal a Report, Narungset a pananglipit ti pasista a rehimena nga US-Marcos, Ang Bayan, Disyembre 2, 2023

₱4.5M



ti danyos a bayadan ti

Jollibee iti 9 a mangmangged nga iligal nga inikkat iti maysa a branch sadiay US idi Pebrero.



2

proyekto a reklamasyon a pinalubusan nga agtultuloy ti operasyon iti bangir ti ubbw a suspensiyo kadagiti aktibidad iti Manila Bay.

Kukua dagitoy ti kroni ni Duterte a ni Dennis Uy ken kasosyo a Chinese a kompanya.


90,000

bala ti kanyon nga aramid-US ken Europe ti maib-ibus kada bulan iti gerra ti Ukraine laban iti Russia, dua dasas a dakdakkel ngem ti kabaelan a partuanen sadiay US ken Europe.

3 MILLION

ti pinapatay dagiti henosidoyo ti US sadiay Vietnam, Cambodia, East Timor, Bangladesh, ken South Africa nga induron ni Henry Kissinger, notoryos a kriminal iti gubat, a nagserbi kas *secretary of state* ti US.

Maysa daytoy kadagiti makagapu nu apay a ramrambakan iti naduma-duma a paset ti lubong ti pannakatay na iti tawen nga 100 idi Nobyembre 29.



Nakulaputan iti dara dagiti Lumad ti ima ni Rodrigo Duterte

Saan a sarsardengan ti al-alya ti pasismo na ken krimen iti sangkataaoan ni Rodrigo Duterte. Kagiddan ti panaglukat manen ti ridaw tapno pastreken ti imbestigasyon ti International Criminal Court (ICC) laban kenni Duterte ken iti grupo na, rimmuar ti barbaro nga impormasyon kanaig iti maysa a kasos ti panagmasaker kadagiti Lumad sadiay Agusan del Sur.

Idi Marso 15, 2020, awan an-aniaman a minasaker dagiti tropa ti 88th IB ti lima nga Higaonon iti Sityo Canada, Barangay San Vicente, Esperanza, Agusan del Sur. Karan man kadagiti biktima ti dua a menor-de-edad. Iti testimonya dagiti kabagan, tiniliw dagiti soldado ni Jellyboy Hagayhay (12), Ryan Lumista (16), Emon Hagayhay (18), Man-apyagan Lumista (19), Nieto Pasandigon (21), ken Pablo Angkamping (40) idi masabat ida

asideg ti purok da. Mapan da idi iti sentro ti ili tapno aglako kadagiti produkto da.

Rinimpong ida dagiti pasista ken nagmalem a tinortyur. Karabian na, pinatay dagiti soldado ti lima. Ni laeng Jellyboy ti nagbiag. Ti bangkay dagidiay lima ket imbilleng lattan iti narabaw nga abut ken saan nga impakammo kadagiti pamilya da ti lokasyon da. Makabulan pay ti napalabas sakbay a nasarakan ti pamilya ti nagikalian kadagiti bangkay a na-

karimpong pay laeng ken natatek ti tama ti bala.

Ni Jellyboy, a nakaimatang ti brutal a krimen, ket pinagbalin nga hostage iti kampo ti militar sadiay Impasug-ong, Bukidnon. Tallo tawen isuna nga inadipen iti uneg ti kampo. Nagkedked dagiti demonyo a pasista a wayaan ti ubing. Pinangtaan da payen ti nagannak ni Jellyboy.

Idi natakuatan ti krimen, kaku-yog ti pangat da ket sinidir ti bumaryo dagiti soldado. Tapno aregluen ken paulimeken dagiti pumurok, pilit nga ipaal-alun-on dagiti soldado ti limos a ₱5,000 kadagiti kabagan ti minasaker. Awan ti inaramid ti kapitan ti baryo ta isuna mismo ket mabaybayadan nga ahente ti National Task Force-Elcac.

Malaksid pay iti masaker, pinuoran met laeng dagiti puersa ti Special Action forces ti PNP ken Armed Forces of the Philippines (AFP) ti eskuelaan ken amin a bal-balay iti Sityo Canada, tallo aldaw kalpasan ti masaker. Dimmapo ti 15 balay iti baryo ken ngan-ngani awan nabati a pagbasaan dagiti Lumad nga imbangon dagiti grupo a relihiyoso ken komunidad. Pinuoran met laeng dagiti soldado dagiti libro, papel ken dadduma a mausar iti eskuelaan.

Saan pay a napnek, pinukan pay dagiti soldado ken pulis dagiti puon ti prutas ken winaknitan ti baryo tapno makababa ti helikopter da. Ni Lt Col Franklin Fabic idi ti kumander ti 88th IB (nga itatta ket kornel ti Unified Command Staff for Intelligence ti AFP WestMinCom).

Manipud 2019, nairekord ti Ang Bayan ti saan a bumaba iti 22 kasos ti panaglabsing iti karbengan-tao, nu sadinno ket maseknan ti 88th IB. Biktima kadagitoy a kasos ti nasurok 3,500 a mannalon ken Lumad.



3 Lumad, pinatuduan ti bala ti 88th IB

PINATUDUAN TI BALA dagiti soldado ti 88th IB dagiti Lumad a da Levi, Jemboy ken maysa a saan a ninaganan iti Sityo Takukon, Barangay Indalasa, Malaybalay City, Bukidnon idi agsapa ti Nobyembre 17. Napan bakir ti tallo tapno mangala ti duryan idi bigla latta ida a pinaltu-paltugan ida dagiti soldado.

Tapno masailakan ti bagbagi da, simyang da ken nagna ti bakras. Napno da ti bugbog, sugat ken troma. Kalpasan ti pasamak, inlastog ti 88th IB a nakakumpiskar da ti maysa nga armas iti pinaruar da nga engkuuento iti NPA.

Kabigatan na, nagreklogo iti barangay ni Datu Andihal, lider-katutubo iti lugar, ken simmango kadagiti soldado ti 88th IB a nakakampo iti Barangay Indalasa ngem saan isuna nga inkaskaso.

7 kontra-demolisyon nga aktibista sadiy Cebu, tiniliw

Bayat a madama ti protesta laban iti iligal nga demolisyon iti 39 a balay idи Nobyembre 28-29, naranggas a tiniliw dagiti puersa ti estado ti pito a kontra-demolisyon nga aktibista ken residente ti Sityo Casia, Barangay Bangkal, Lapu-Lapu City, Cebu. Pinidut dagiti pulis ti uppat a residente a da Marjhun Amoroto, Belt Sasar, Lito Padillon ken Cris Gabutan ken ti lider ti Anakbayan-Cebu a ni Kei Galon, ni Diviemar Opo ti Anakbayan-Lapu-Lapu, ken ni Howell Villacrucis ti AMA-Sugbo-KMU. Winayaan ida kalpasan ti dua aldaw.

Kuna ti grupo, iligal ti inaramid a demolisyon ta awan ti naipakita dagiti pulis nga uray ania a papeles a naggapu korte. Imbutaktak ti dua a grupo nga impudno mismo dagiti awtoridad kadakuada nga "sikreto a demolisyon" ti napasamak gapu ta awan ti ligal a basaran na daytoy.

Idi pay 2006 a nagrugni ti panaglaban ti umili iti Sityo Casia para iti karbengan da a makapagnaed. Ti nakuna a daga ket tagtagikuuen ti pamilya Mangura.

Pammapatay. Natay idi Disyembre 6 ni Banny Tobalado, mannalon iti Sityo Karanawan, Barangay Amuntay, Binalbagan Negros Occidental gapu iti awan an-anawa a panangpaltug ti maysa a platuun ti 62nd IB. Rinaut ken pinaltu-paltugan dagiti soldado ti balay na idi alas-5 ti agsapa, a pinaruuar da nga "engkuuento."

Panagdukot. Dinukot dagiti puersa ti estado ni Mar Silos, organisador kadagiti mangngalap ken

mannahon, iti Barangay Montecillo, Sariaya, Quezon idi Nobyembre 29. Kameng isu ti Pagkakaisa ng mga Magsasaka at Tagapagtuguyod sa Ikalawang Distrito (PAMATID)-Quezon. Am-ammo isuna kas napiaget a mangilablaban iti karbengan dagiti mangngalap ken mannalon sadiay Gitnang Luzon.

Panangpaltug. Awan panangkankano a nagpaputok ti paltug ti 50th IB sadiay Barangay Matara-gan, Malibcong, Abra idi Nobyembre 20. Pinaruar ti 50th IB nga adda napasamak nga "engkuuento" iti nasao nga lugar ngem insigida a pinaawan-kinaagpayso na ti New People's Army (NPA)-Abra. Inuulbod met kano ti ibagbaga ti 50th IB a nakkumpiskar da ti maysa nga MI4, tallo nga M16, maysa a K3 light machine gun, ken dua a bandoyer. AB

Baboy ken nuang a programa a BDP, kinurakot ti militar ken NTF-Elcac

AWAN SIMMANGPET A baboy ken nuang nga inkari ti Armed Forces of the Philippines (AFP) ken ti National Task Force-Elcac kadagiti mannalon ken katutubo a minorya kadagiti baryo ti Abra. Segun kadagiti residente, uray buryas ket awan pay naawat da. Dagitoy ket paset ti "suporta nga agrikultural" nga adda pondo manipud iti Support to Barangay Development Program (SBDP) ti NTF-Elcac.

Riri dagiti residente, nasayang laeng ti ginastos da a nagpaaramid ti pagipupokan para kadagiti inkari nga dinguen. Imbes a nuang, sangkabassit a mula laeng ti naited kadakuada. Imbes a baboy, sig-uppat a piyyek ti inted kadagiti residente.

Pinagbalin a nengneng dagiti tao idi nagiwaras ti AFP ti feeds (makan) ti baboy ngem awan pulos naited a taraken a buryas. Nagiwaras met laeng ti NTF-Elcac ti feeds para iti lames idintu nga awan met piskarya weno fishpond iti lugar, ken awan met naited a fingerlings a mapaadu koma.

Iti probinsya ti Abra, adda ti 28 barangay nga inpauneg ti NTF-Elcac iti proyekto nga SBDP manipud 2021. Inlatangan daytoy ti kumalkalansing a ₱236.7 milyon. Iti kasumbangir na, awan met makitkita kadagiti barangay iti ibagbaga a proyekto a pangkabiagan ken pangkadur-asan a pinoduan dagitoy.

Segun iti New People's Army (NPA)-Abra, "Ammo ti umili ti probinsya a ti SBDP ket nagbalin a pagbagasan dagiti opisyal ti AFP. Ibulbalsa da ti bilyun-bilyon a pondo na ken awan benepisyo a maidandanon kadagiti barangay."

21-gun salute para kadagiti martir ti Partido, inruessuat sadiay EV ken ST

INRUSSUAT DAGITI yunit ti New People's Army(NPA) iti Eastern Visayas ken Southern Tagalog ti 21-gun salute tapno saluduan dagiti martir ti Partido Komunista ng Pilipinas (PKP) ken rebolusyonaryo a tignayan kadagiti rehiyon da.

Idi Nobyembre 30, inruessuat ti NPA-Southern Tagalog ti 21-gun salute para kenni Josephine Mendoza (Ka Sandy), lider ti Partido iti rehiyon. Kagiddan na, nagirussuaat met dagiti yunit ti Partido ditoy kadagiti limed a panaggu-ummong ken pammadaway kanyana.

Idi Nobyembre 23, inikkan ti naulimek a 21-gun salute ti NPA-Eastern Visayas kas saludo iti Imelda 6, ti innem nga kakadua a nagmartir iti panangbomba ti 8th ID iti Barangay Imelda, Las Navas, Northern Samar idi Nobyembre 23, 2022. Inda sinaluduan da Ka Helenita Pardalis (Ka Elay), Ka Gil Giray (Ka Biboy), Ka Mamoy, Ka Mela, Ka Mike ken Ka Joshua.

Pinadayawan met ti National Democratic Front-EV dagiti martir ti Dolores 22, Catbalogan 10 ken Bobon 7, amin a biktima ti terorista a panangbomba ti 8th ID, ken amin a martir ti rebolusyon a Pilipino.

Operasyon a *dredging* iti Misamis Oriental, paspasardengen

Naggan-od ti inisyal a balligi dagiti residente ti maysa a barangay iti Jasaan, Misamis Oriental idi temporary nga ipasardeng dagiti operasyon ti maysa a kumpanya a karaman iti panagkalkali iti darat para iti proyekto kasilpo ti Dolomite Beach iti Manila Bay ti sigud a rehimene Duterte. Idi Setyembre 7, napasardeng ti maysa a lokal a timpuyog dagiti residente ti Barangay San Nicolas iti nakuna nga ili, ti manangdadael a *dredging operation* ti kumpanya a Premium Megastructure, Inc. (PMI).

Napnuan danag dagiti residente ti Barangay San Nicolas ken dagiti kaasideg na a barangay. Agop-operasyon iti akinngato a paset ti Kabulig River ti planta nga hydropower ti kumpanya a Mindanao Energy (Menergy) manipud pay idi 2013. Idi pay a pagdandanagan dagiti residente nga amangan nu mareffaay ti dam nga mangilinned kadagiti komunidad da. Pakpakaruen ti operasyon ti PMI ti makuna a pangta.

Laksid iti peggad iti komunidad, manangdadael iti aglawlaw ti panagkwari ken *dredging* ti kumpanya.

Ania ti PMI?

Nangruji kas kumpanya a konstruksyon ti PMI sadiay Leyte idi 2012. Immado dagiti operasyon na kalpasan a maparaburan ti pampubliko a kontrata iti panagaramid ti haywey iti Leyte. Ngem kapartakan ti panagdakkel ti kumpanya iti poder ti rehimene Duterte nu sadinno a nagpalawa daytoy ti operasyon iti reklamasyon ken *dredging*. Tagikua daytoy ni Alfredo Comendador Jr.

Iti Region 10, kangrunaan nga adda iti *dredging* iti darat dagiti operasyon na. Nanyon iti pannaka-iraman iti perwisyoo a tugot na iti rehiyon, karaman met ti kumpanya kadagiti manangdadael a proyekto nga impostastruktura iti sabali a paset ti pagilian. Laksid iti Dolomite Beach, kontraktor

ti kumpanya iti proyekto a Cebu-Cordoba Link Expressway ken Bataan Transhipment Hub (BTH), agpada a maibibilang iti kadadakkelan a proyekto nga impostastruktura ti estando. Ti BTH ket proyekto a sangladan a mangigabur ti 235 ektarya a daga iti Mariveles Bay.

Manangdadael a *dredging*

Idi 2021, nagsumite ti aplikasyon ti PMI para iti panagkwari iti Kabulig River a masarakan iti Barangay San Juan ken kadagiti kaasideg na a barangay a San Isidro ken Solana iti Jasaan. Plano ti PMI a bungen ti nakali a graba manipud iti Barangay Los Banzon, iti pada nga ili, ken ipan sadiay Manila Bay para iti reklamasyon. Insigida daytoy a sinupiat dagiti residente.

Madandanagan dagiti residente iti biag da gapu ta mabalin nga iyanod iti layos ti uppat a purok ti barangay. Maapektaran met dagiti agna-naed asideg iti baybay iti Barangay Bubuntungan ken Lower Jasaan.

Nagurnong ti pirma dagiti ka-

meng ti timpuyog iti bukbukod da a barangay tapno ipetisyon ti panagpasardeng kadagiti operasyon ti PMI. Inyasideg da daytoy iti munisipyo iti Jasaan. Sigida da met a nagsumite ti petisyon kadagiti opisina ti Department of Environment and Natural Resources (DENR) iti munisipyo ken probinsya.

Idi Marso 13, 2022, natuloy ti operasyon ti PMI. Pinalubusan ti sigud a barangay kapitan ti San Nicolas a ni Warren Manggo, a rentaan ti kumpanya ti 15 ektarya a daga ti residente a ni Sabas Tagarda. Panagpampambar na "awan simmupiat a residente iti panagserrek ti PMI." Gapu kadaytoy, nagsampa ti kaso a "falsification of public document" iti Ombudsman dagiti residente laban kenni Manggo.

Nakaro pay, nakalanad iti permit ti PMI a *dredging* ti aramiden da iti San Nicolas, ngem iti aktwal, panagminas ti black sand ti inaramid ti kumpanya.

Gapu kadaytoy, aglalo pay a pimmisa ti panagsalangad dagiti residente. Sinaklaw iti *signature campaign* da dagiti dadduma pay a barangay a maapektaran ti proyekto ken nagprotesta da iti sango ti agtultuloy nga operasyon ti PMI. Karaman iti iruprupir dagiti residente ti panaglabsing ti PMI iti inkeddeng a graba nga alaen.

Ammo dagiti residente ti San Nicolas a saan pay a nagleppas ti laban da. Maawan-an ti bileg ti naibaba a *temporary restraining order* (TRO) iti kumpanya itatta a Disyembre. Kasta met, agtultuloy ti panagkwari na kadagiti kaasideg a baryo ti San Isidro ken Solana. Agtultuloy da a tumakder para iti daga da ken iti aglawlaw. AB



Henosidyo nga marka-Amerika

Manipud Nobyembre 24 aginggana 30, temporaryo nga insardeng ti Israel el ti panagbombomba na iti Gaza tapno isayangkat ti "prisoner swap" nu sadinno a winayawayaan ti Hamas ti 105 iti 345 a kinemmeg na iti operasyon nga Al Aqsa Flood kasukat ti 240 iti agarup 10,000 Palestino a nakabalud iti Israel. Karaman kadagiti winayawayaan ti Hamas ti dua a Pilipino a migrante a mangmangled.

Kalpasan ti 6-aldaw a "makatao a pangmabiitan a sardeng-putukan," pinalubusan manen ti Israel dagiti eroplano a pang-gerra iti Gaza idi Disyembre 1, alas-7 ti bigat iti Palestine. Iti uneg ti simmaruno a 24 oras, dimmanon iti 184 dagiti Palestino a napapatay, 589 ti nasugatan ken 20 balay ti dimmapo kadagiti intinnag a bomba. Sakbay na, naseroken 15,000 Palestino ti napapatay iti panagbombomba ti Israel. Surok 5,300 kadakuada ket ubbing.

Amin nga eroplano nga us-usaren ti Israel ket manipud iti US ken amin dagiti bomba nga itintinnag na ket dagiti bomba ti Amerikano. Iti kabuklan, 80% kadagiti armas ti Israel ket aramid-US.

Panagpondo iti Zionismo

Pinataud ken pinagtalinaed ti imperyalistika nga US ti karasaen a Zionista nga estado ti Israel. Manipud Maikadua a Gerra a Sangalubongan, immawat daytoy ti \$146 bilyon, a kadakkelan iti ayuda nga itited ti US kadagiti pagilian nga alyado ken mala-kolonya na. Agarup amin dagitoy ket adda iti langa iti ayuda a militar, laksid iti sumagmamano a tao a nagikabil ti ayuda a pang-ekonomya ti US tapno aramiden nga "industriyalizado" ti pagilian.

Tulbek daytoy a ga-higante a pondo iti panagpadur-as iti Zionista a pasista a makinarya. Sakbay nga insayangkat ti Al Aqsa Flood, nu sadinno a naserrek dagiti pwersa a Palestino ti naduma-duma a kampo ken lugar iti Israel, ilastastog daytoy a "pinaka-sopistikado a militar iti intero a lubong iti tungtungan ti teknolohiya." Inusar met daytoy nga ayuda tapno ibangon ken padur-asen ti industriya ti armas iti Israel a kasosyo dagiti monopolyo a kum-


panya ti armas nga Amerikano. Sumagmamano iti kadadakkeilan dagiti kumpanya nga Elbit Systems, Israel Aerospace Industries ken Rafael.

Iti agdama nga henosidyo na iti Gaza, pinasingkedan ti Kongreso ti US ti singasing a sigida a nayonan ti \$14.3 bilyon iti sigud a tinawen a \$3.3 bilyon nga ayuda militar iti Israel. Daytoy nga ayuda ket adda iti langa dagiti misayl nga Hellfire, 55mm pambala kadagiti kanyon, *night-vision*, dagiti armas a "bunker-buster" (pangkontra kadagiti *tunnel*) ken dagiti kababaro a lugan militar. Nayon dagitoy iti siguden nga isup-suplay ti US a misayl para iti Iron Dome ken dagiti bomba nga itintinnag dagiti eroplano. Supsuplayan met ti US ti Israel kadagiti kemikal ken bayolohikal a pang-gerra a materyal.

Mataytaya a \$48 bilyon ti inggaburen ti Israel iti agdua-bulanen a kampanya ti henosidyo. Tersia iti daytoy a gatac ti binaklay ti US.

Naisangsangayan a papel iti Middle East

Iti kaunggan na, agraraira ti Zionista nga estado ken pasista a makinarya ti Israel tapno pagtalinaeden ti hegemonya ti US iti Middle East. Manipud pay dekada 1980, ingkabil ti US ditoy ti *weapon stockpile* weno imbakan ti armas a kadakkelan iti ruar ti bukod a pagilian, kas pangsigurado nga alisto daytoy a maipuesto dagiti armas kas pangarigan gumil-ayab ti aniaman a "pangrehiyon a gulo." Nakadulin iti uneg ti pagilian ti inawagan a War Reserve Stockpile Allies-Israel weno WRSA-I a kontrolado ti US. Tina wen, mangikabkabil ti US ti \$200



milyon tapno punnuan ti maus-usar kadagiti armas ditoy. Adda kapada nga imbakan iti South Korea ken Japan, ken agsagsagana itatta ti US kadagiti pasilidad iti Pilipinas para kadaytoy.

Idi Oktubre, induron ni Joseph Biden, presidente ti US, nga ikkaten dagiti restriksyon iti panagala ti Israel ti armas iti daytoy nga imbakan tapno nawaya na a mausar dagiti armas ti US iti henosidyo iti Gaza.

Inted ti US iti Israel ti istatus a "mayor nga alyado a di-NATO" ken nairut nga insilpo ti pasista a buyot na iti buyot Amerikano. Manipud 1983, nagtinnulong a pinadur-as ti US ken Israel ti Israel Defense Forces, nga iti aktwal ket maysa a puersa nga opensibo para iti nadara a kampanya a panagsakop kadagiti territoryo a Palestino.

Agmanmantinar met ti US ti bukod a puersa iti uneg ti Israel, nayon iti rinib-ribu a naka-istasyon iti naduma-duma a pagilian iti Middle East. Idi 2017, inwaragawag ti US ti konstruksyon ti permanente a base nga Amerikano iti uneg ti maysa a kampo militar ti Israel iti disyerto a Negev, a 20 kilometro ti kaadayo na iti Gaza. Dua bulan sakbay ti Al Aqsa Flood, nangigabur ti US ti \$35.8 milyon tapno palawaen daytoy a sikreto a base, a tinudingan a "Site 512" ken inawagan a "base iti uneg ti maysa a base."